

Script of Evening Gojri News Bulletin 22 November 2024 at 1700 Hrs
ایوننگ گو جری نیو ز بلیٹن مو رخہ 22 نومبر 2024

یوہ آکا شوانی جموں ہے محمد اکرم چودھری تے اظہر حسین تیں خبر سُنو۔ پہلاں خاص خاص خبر۔

- *1۔ وزیر اعلیٰ عمر عبداللہ نے کابینہ میٹنگ غی صدارت کی تے اس دوران تخصص، روزگار تے نویں پہرتی ور گل بات ہوئی۔
- *2۔ صدر جمہوریہ درویدی مُرمو نے شہریاں نانہ کہیو ہے جے وے مُلک پہلاں غا گا نظریہ نانہ اپناویں۔ تاکہ بھارت نانہ ترقی یافتہ مُلک بنایو جا سکے۔
- *3۔ وزیر اعظم نریندر مو دی غا 5 روزہ سفارتی دورہ مانہ نا ئجیریا، برازیل تے گیانہ نال بڑا پیمانہ ور دو طرفہ میٹنگ ہوئی ہیں۔
- *4۔ تے شمالی کمان غا جی او سی نے نوی شامل کی گئی بھارت کی تیار کردہ اُسمی مشین پستول غو جائزو لیو ہے۔

خبراں غی تفصیل نال پہلاں محمد اکرم چودھری۔

Omar Cabinet Meet

وزیر اعلیٰ عمر عبداللہ نے اج اپنی حکومت غی دوجی کا بینہ میٹنگ جموں مانہ اپنی رہا نش گاہ ور منعقد کی۔ آکاشوانی جموں غا نامہ نگار نے خبر دتی ہے جے اس اجلاس مانہ کابینہ غا تمام وزراء موجود تھا۔ کابینہ غی اس میٹنگ مانہ ترقی نانہ فروغ دین اور انتظامیہ غی کلیدی للکار سنگ نمڑن واسطے اہم پالیسیاں ور تبادلہ خیال کیو گیو۔ اس میٹنگ مانہ عوامی فلاح و بہبود ور وی تو جہ مرکوز کی گئی جس مانہ انتظامی نظام نانہ بہتر بنان اور عوام واسطے بہتر خدمات نانہ یقینی بنان ور تبادلہ خیال کیو گیو۔ واضعہ جے کا بینہ نے انتظامیہ نانہ مضبوط بنان اور معاشرہ غا مختلف طبقات نانہ فائدو دین واسطے نواں اقدامات متعارف کران غا منصوبیاں غو وی جائزو لیو گیو۔ اور اس میٹنگ غے دوران بکھ بکھ مسائل ور تبادلہ خیال کیو گیو جن مانہ تخصص، روزگار تے نوی پہرتی شامل ہیں۔

Prez Nation First

صدر جمہوریہ درویدی مُرمو نے اج اک ترقی یافتہ مُلک بنان واسطے تمام شہریاں نانہ قومی پہلی نقطہ نظر نانہ اپنان غی ضرورت ور زور دتو۔ صدر جمہوریہ اج سویرے حیدرآباد مانہ لوک منتھن غا چوتھا شمارہ غو افتتاح کرن توں بعد اجتماع سنگ خطاب کر رہی تھیں۔ انہاں نے کئی شعباں مانہ تنوع غے باوجود د مُلک نانہ اک جُٹ رکھن واسطے بھارتی ثقافت، زبان، روایات اور علم نانہ نوے سرے توں زندہ کرن غی ضرورت ور زور دتو۔

DC Samba

ڈپٹی کمشنر سانہ راجیش شرما نے سینئر سپرنٹنڈنٹ آف پولیس سانہ وریندر سنگھ منہاس نے اجکڑا، امرتسر دہلی شاہراہ پروجیکٹ توں وابستہ مزدور کیمپاں غی جامع حفاظت بارے جائزو لیو۔ یوہ جائزو ایمرز غی تنصیبات گا پہلا حفاظتی جائزہ توں بعد کیو گیو ہے۔ اعلیٰ سطحی حفاظتی جائزو بھارت غی قومی شاہراں با رے اتھارٹی غا عہدیداراں اور تعمیراتی کمپنیاں غا نمائنداں غے نال کیو گیو جس غو مقصد ککڑا، امرتسر، دہلی شاہراہ پروجیکٹ مانہ شامل افراد قوت غا تمام حصاں غی حفاظت واسطے مضبوط حفاظتی اقدامات نانہ نافذ کرن ور توجہ مرکوز کی گئی۔ عہدیداراں نے مزدور کیمپ غا مختلف مقامات ور موجودہ حفاظتی پروٹوکال تے ڈھانچہ با رے جائزو لیو۔ اور تمام کمیاں نانہ فوری طور ور دور کرن غی ہدایت کی۔ ذرائع ابلاغ غا نمائنداں سنگ گل کرتاں واں ڈپٹی کمشنر سانہ راجیش شرما نے اس طرح کہیو۔ بائٹ۔

Kathua Agriculture

زراعت پیداوار تے کساناں غی فلاح و بہبود با رے محکو ضلع کٹھوہ مانہ مجموعی زرعی ترقیات پروگرام غے تحت پورا سال مشروم غی کا شتکاری ور کم کر رہیو ہے۔ اعلیٰ زراعت افسر کٹھوہ سنجیو رائے نے کہیو ہے جے پہلاں مشروم غی کا شتکاری سال مانہ دوبار وے تھی ور ہن محکو سکیمان غے تحت بکھ بکھ اقدام چاغے کساناں نانہ تربیت تے تعلیم دے رہیو ہے جن مانہ خاص طور ور کالسری کسان شامل ہیں جے کس طرح مشروم غی پورا سال کا شت کی جا سکے۔ تاکہ اُن نانہ باضابطہ آمدن حاصل ہو تی رہ۔ محکمہ نے ہدف مقرر کیو ہے جے اس سال 8 ہزار کونٹل مشروم تیار کیو جا سکے۔ انہاں نے اس موقعہ ور اس طرح کہیو۔ بائٹ۔

Power Grid

اُدھم پور غا ضلع ترقیات دفتر مانہ اج کا ریو ریٹ سماجی ذمہ داری پروگرام غے تحت پاور گریڈ کا ریو ریشن انڈیا لمیٹڈ غی طرفوں ضلع انتظامیہ نانہ 5 کوڑہ چان آلی گڈیں تے ٹی بی جانچ واسطے اک ٹرونٹ مشین دتی گئی ہے۔ یاہ مشین سینئر جنرل منیجر نا ردرن رینج دو شفقت احمد نے پاور گریڈ غی طرفوں ڈپٹی کمشنر سلونی رائے نانہ پاور گریڈ تے ضلع انتظامیہ اُدھم پور غا سینئر افسراں غی موجودگی مانہ دتی ہیں۔ اس موقعہ ور ڈپٹی کمشنر سلونی رائے نے پاور گریڈ غو اس طرح غو اقدام چان واسطے شکریو ادا کیو۔ اور کہیو جے اس نال عام لوکاں نانہ بہت مدد ملے گی۔ اس موقعہ ور آکاشوانی نال گل کرتاں واں ڈی سی اُدھم پور نے سلونی رائے نے اس طرح کہیو۔ بائٹ۔

Goa IIFFI

اج بھارت غا 55 بین القوامی فلم فیسٹول مانہ فلماں غی نمائش گو دوجو دن ہے۔ اس دوران بکھ بکھ انواع زبانان تے ملکاں غی پروڈیکشن ور 70 توں زیا دہ فلماں غی نمائش کی جانی ہے۔ فلم فیسٹول غے دوران نامور فلمی شخصیات جن مانہ ناگ ارجن، اکنانی، ودھو ونود چوپڑا تے منی رتنم سامعین نال مشغول ہون واسطے تیار ہیں۔ تقریب غا حصہ جیسو کہ سفر نامہ نمائش تے آئی ایف ایف لسٹا جن غو افتتاح گذشتہ شام نانہ ہوؤ تھو۔ امید کی جا رہی ہے جے اج کافی تعداد مانہ لوکاں نانہ اپنے پاسے راغب کرے گو۔ اس توں علا وہ تقریبات غا تازہ سلسلہ مانہ شرکاء تے ناظرین غو انتظار کر رہیا ہیں۔ دن غا

سب تیں زیادہ متوقع لمحات مانہ اک آئی ایف ایف آئی پریڈ ہون جا رہی ہے۔ جہیڑی انٹرٹین منٹ سوسائٹی آف گواہ غا دفتر توں کاکا اکیڈمی آلے پاسے جاتا سڑکاں نانہ روشن کر دے گی۔

یہ خبر تم آکاشوانی جموں تیں سُن رہیا ہیں خبراں غا باقی حصہ نال اظہر حسین۔

PM Foreign Visit

وزیر اعظم نریندر مودی غی 5 روزہ دورہ غے دوران نائجیریا، برازیل تے گیانہ مانہ دو طرفہ بھر مار دیکھی گئی ہے۔ جناب مودی نے اپنا 31 ملکاں غا دورہ غے دوران 31 دو طرفہ میٹنگ تے عالمی رہنماواں غے نال غیر رسمی گل بات مانہ حصولیو ہے۔ دورہ غے دوران جناب مودی نے نائجیریا مانہ اک دو طرفہ میٹنگ کی تے نال ہی برازیل مانہ جی 20 چوٹی کا نفرنس غا ہاشیمہ ور دس دو طرفہ میٹنگ تے گیانہ مانہ 9 ایسی میٹنگاں مانہ حصولیو ہے۔ برازیل مانہ ہون آلی دو طرفہ ملاقات مانہ وزیر اعظم مودی غی انڈونیشیا کا صدر پربو سوبینتو تے پرتگال غا وزیر اعظم لیوس مینٹنگرو، برطانیہ غا وزیر اعظم کیر سٹارمر، ارجنٹینا کا صدر نال پہلی ملاقات ہوئی ہے۔ جناب مودی نے اس دوران سنگاپور، جنوبی کوریا، مصر، امریکہ، سپین غا لیڈراں تے بکھ بکھ بین القوامی تنظیمیں کا سربراہاں نال وی غیر رسمی گل بات کی ہے۔

GOC Northern Command

فوج غی شمالی کمانڈ غا کمانڈر لیفٹننٹ جنرل سُچندرا کمار نے اج نواں شامل کیا گیا آسمی مشین پستولاں غو جائزو لیو۔ آکاشوانی جموں غا نامہ نگار نے خبر دتی ہے جے فوجی کمانڈر نے اُدھم پور مانہ نواں شامل کیا گیا آسمی مشین پستولاں نانہ فائرنگ کی۔ فوج نے اس مہینہ غا شروع مانہ 550 دیسی ساختہ آسمی مشین پستولاں نانہ شمالی کمان مانہ شامل کیو جہیڑی لداخ تے جموں کشمیر مانہ تلاشی کا روائی غی نگرانی کرے گی۔ اس غو مقصد خصوصی افواج نانہ قریبی لڑائیاں اور شمالی تھیٹر مانہ خصوصی کا روائی واسطے لیس کرنو ہے۔ شمالی کمان نے ایکس ور کہیو ہے کہ میک ان انڈیا ہتھیاراں غی شمولیت توں بھارتی فوج غی آتم نربہر بھارت واسطے غیر متزلزل عزم نانہ اُجاگر کرے۔

Rajnath Japan

وزیر دفاع راجناتھ سنگھ نے اج لاؤس غا وینٹائنہ مانہ اپنا جاپانی ہم منصب جنرل نکا تا نی نال ملاقات کی۔ اک سماجی میڈیا پوسٹ مانہ وزیر دفاع نے یقین ظاہر کیو کہ دوہاں ملکاں غے درمیان شراکت داری اک آزاد گھلا اور قواعد ور مبنی بھارت بحر الکابل خطہ نانہ یقینی بنان مانہ اہم کردار ادا کرے گی۔
